

# Yuenaxr Sul

## Gurlir Azo Biar

Yuenaxr sul eil ber mel Arbosobo Yirsaexllixl su Yuenaxr mi ca ar ddei leil miardal a Nixrnixrwei su ca mel leil bei nr sir bei nr ddo, huixrsoxr nia eine bbeix gger ssi lol biar arddeir a. Yaa huixrsoxr arddeirnga a, Arbosobo yaa leil nr faxr. Nael Yuenaxr Arbosobo ddei ddar no-nr-ni, yaa leil bbeix nr gger ssi. Yar mel yaa leil yarzi vuxryixr, yel Arbosobo yaa leil perniar lol nia-nr-zzir. Yel yar dder cirza-hanga nr seir pex dae a.

Sul eil ber mel niul ca mel leil ca mel bei nr sir bei goxr a lei Arbosobo halae niul leil perniar, niul leil huixrsoxr lol eine bbeix gger arddeir a.

## Yuenaxr Arbosobo Ddei Ddar Nr No

**1** <sup>1</sup> Cir ni a, Arbosobo Yihexrhuaxr Yalmirtaexl ddei ssor Yuenaxr leil bbeix: <sup>2</sup> “Ni nialngasael Nixrnixrwei zzi vaervaer hal ddei gga ssi a halmaex ca mel leil zabbar-seilseir a bbeix gger ssi, yaa bei nr sir bei dae mel, ngo mia a!” <sup>3</sup> Nael, Yuenaxr mel, Yihexrhuaxr ddar nr no, yar Yihexrhuaxr meixsaer qir leil Tasi mermi pa mal. Yar neixvi qir leil Yuepal zzi gga ze ci a, Tasi mermi ssi cuaxr ar jiaxl zo wo a. Yar cuaxr per gger ho a dder cuaxr ar jiaxl leil ddeix a, cuaxr gga ca mel dax cirgo a Tasi mermi ssi a. Yar zzirdae a, halmaex pa mal a, Yihexrhuaxr dax cirgo a nr hher dae a.

<sup>4</sup> Nael Yihexrhuaxr mel, neixvi teixlleil mersi daxlgaxl jia lol, cuaxr jiaxl lei jia xiaxr gger niazzir dae a. <sup>5</sup> Cuaxrkaesu ca mel gexr du lei a; yel worcixl-worni armael mermi ddei seirpormar leil ae dae a yaa leil jiuxl la qiuxr doxr dae a. Yaa cuaxr jiaxl ardoxr la lol niazzir a cuaxr gga zzaegu zzu neixvi gga piar ji gger. Nael Yuenaxr mel halae cuaxr jiasibbor zir gga hher dae a yixrmeixljjiu mil si a.

<sup>6</sup> Yel cuaxr seirpor ddei yar leil mia a dder bbeix: “Giel, arsaenga a halae eilmaex yixr doxr dae leir? Ha du la! Ni ddei seirpormar leil ae dae a arleixr qiuxr, yar niul leil zoxlnixr, niul leil nr si lol piar a.”

<sup>7</sup> Cuaxrkaesu mel zzicarzzi dax bbeix: “Mersi daxlgaxl jia a arseir zzi a bbe, niul arleixr nijiu lei.” Yel dder Yuenaxr nijiu wo a. <sup>8</sup> Yaa yar leil bbeix: “Arsaenga a mersi daxlgaxl jia? Ni mel azo bei su a? Ni arddolmaex lei? Ni arddol su ca a?” Ni ngua leil bbeix gger la.

<sup>9</sup> Yuenaxr ddarkoxl a bbeix: “Ngo Xiboxrlaexr su a. Ngo merlabbor hher dae Arbosobo Yihexrhuaxr leil gexr. Yar mel neixvi nei middur bei teixl lei su ddei nga a.” <sup>10</sup> Yuenaxr Yihexrhuaxr leil pa dae yaa leil bbeix gger ho a yaa gexr zildu a.

Yel yar leil bbeix: “Ni arsaenga a eine bei leir?” <sup>11</sup> Mersi ddei mel ho jia ho vaer a, yaa yar leil bbeix: “Ngua, ni leil arsae bei a saelnei neixvi teixlleil mersi jia nr var?”

<sup>12</sup> Yuenaxr yaa leil ddarkoxl a bbeix: “Mersi daxlgaxl jia a mel, ngo zzi a. Nia ngo leil bil du lei a ajjix gga piar ji gger a, neixvi teixlleil dder mersi jia nr var a.”

<sup>13</sup> Cuaxr gga ca mel, worcixl-worni cuaxr jiaxl yarqir leil huaxr mal niazzir. Nael mersi ddei ho jia ho vaer a, huaxr mal nr cexr.

<sup>14</sup> Yel yaa Yihexrhuaxr leil ae dae a bbeix: “Yihexrhuaxr, ngua ni leil qiuxr, ca eil ddei zzi a, ngua leil jiujiu tor nr si lol. Yar ca seir arddeirnga a, ngua yar leil neixvi gga piar ji gger zzorbbeixlei, ngua leil tor nr faxr. Eil zzu mel dder ni xiar dae mel sael a bei dae arddeir a.” <sup>15</sup> Bbeix jjia a, yaa dder Yuenaxr leil bil du lei a, neixvi gga piar ji gger a; yel neixvi teixlleil dder mersi jia nor a. <sup>16</sup> Cuaxr gga ca mel dder Yihexrhuaxr leil gexr zildu a. Yaa zzeir seixl a, Yihexrhuaxr leil zi; yaa halae Yihexrhuaxr leil bbeix, yaa arsae bei nia bbeix goxr a mel, yaa arddolcar arsae bei lei bei ci nia.

<sup>17</sup> Yihexrhuaxr mel ngol vaer ar ddei leil miardal a, Yuenaxr leil ixl ji lol. Yel Yuenaxr ngol xilbe gga so xixl so ni hher a.

### Yuenaxr Arbosobo Dax Ddar Biar

**2** <sup>1</sup> Yuenaxr mel ngol xilbe gga hher dae a, Arbosobo Yihexrhuaxr dax ddar biar a. <sup>2</sup> Yar bbeix:

“Yihexrhuaxr, ngo yarzi zzasol car,  
ngo ni leil ae a, ni ngo leil ddarkoxl a.

Ngo ca si ho a hher ggie hher dae car,  
ni leil qiuxr a, ni bbejjiur a.

<sup>3</sup> Ni ngo leil neixvi neixl zzir ggie piar ji gger a,  
ngo dax zaza-lili lei ajjix a nga;  
bolaxl ddaexr dae ajjix mel  
ngo leil mil gex du lei a.

<sup>4</sup> Ngo xiar dae a, ni ngo leil ni dax ggaxr pixl gger a.  
Nael ngo ni ddei xi<sup>a</sup> gga jjixr lei niazzir.

<sup>5</sup> Ajjix mel ngo leil mil gex dae a,  
ngo niuxl zil niazzir dae a;  
ngo dax zaza-lili lei ajjix yarzi neixl,  
ajjix gga silbbar mel lei ngo oldde taex leil ssox gex dae a.

<sup>6</sup> Ngo worjibbei dax zei ci a, eilmaex mel, alddur zzux gex dae a,  
ggapu nixixl nr zza hal mel sael a nga.

Nael, ngo ddei Arbosobo Yihexrhuaxr,  
ni ngo leil ca si ho a hher ggie halmaex gga gga deix xixl lei a.

<sup>7</sup> Yihexrhuaxr, ngo si niazzir dae car, ni leil holcir du lei a,  
ngo ni dax ddar biar;

ni, ni ddei xi gga hher dae lei,  
ngo ddar biar dae mel bbejjiur a.

<sup>8</sup> Bbex leil olddetexl su mel mel  
yaa leil perniar su Arbosobo ddei dax nr naer a.

<sup>9</sup> Nael ngo mel ni leil nawo a,  
ni leil zzeir seixl zi nia;

ngo arsae bei nia bbeix goxr a mel, ngo arddolcar arsae bei lei  
bei ci nia.

Yihexrhuaxr larni ca leil jiuxl cexr!”

eine bbeix a.

---

<sup>a</sup>2:4 ni ddei xi Halleix mel Arbosobo ddei xi giex Yirsaexllixl goxrjia gga Yiluxlsaler zzi gga zza dae.

<sup>10</sup> Giedae Yihexrhuaxr ngol ddei leil miardal a, Yuenaxr leil peixl teixl xixl lei lol, yel ngol ddei dder yar leil hieltebbor peixl dol gger a.

### Yuenaxr Arbosobo Ddar No

**3** <sup>1</sup> Yihexrhuaxr yoxl nr boxl ddei Yuenaxr leil bbeix: <sup>2</sup> “Ni nial-ngasael Nixrnixrwei zzi vaervaer hal ddei gga ssi a, halmaex ca mel leil ngo ni leil miardal dae mel bbeix gger ssi.” <sup>3</sup> Yel Yuenaxr dder Yihexrhuaxr arsae bbeix yar arsae bei a. Yar Nixrnixrwei zzi gga ssi a. Zzi eil ddei mel, yarzi vaer, so ni ssi a saelnei zzi cirddei-lorbba ssi jjia ddo. <sup>4</sup> Nael Yuenaxr Nixrnixrwei zzi ddei gga ddir a, cir ni ssi a, yel bbeix: “Zeixleixr licei ni goxr a, Nixrnixrwei zzi ddei dder de ze du a!”

<sup>5</sup> Nixrnixrwei zzi gga ca mel, Arbosobo Yuenaxr leil bbeix lol ddar mel leil ddarzzi a bbeix: “Niul zzor nr ddo dda nr ddo.” Yel vaervaer-yeye ca maelmaerjjia lei zzir pia veixr dae a, huixrsoxr.

<sup>6</sup> Nixrnixrwei zzirmar ddei mel, ddar eilmel bbejjiur a, yel dder yar veixr dae pia naxrcixl mel lixr teixl a, zzir pia lael ngexl a; yar cux ggie baxrde taex leil nr cux, kurlu gga cux ji dae. <sup>7</sup> Zzirmar nei yar woxrke vaervaerpor mel yoxl Nixrnixrwei zzi gga ca mel leil miardal a bbeix:

“Ca nei zzeir lei zzor nr ddo, dda nr ddo. <sup>8</sup> Ca nei zzeir lei zzir pia veixr nia. Ca cirddei-hanga lei Arbosobo leil zabbar a qiuxr doxr nia; cirza-hanga bei nr sir mel, zeixleixr lei bei nr ddo a. <sup>9</sup> Nrbba Arbosobo niul eine bei ggie mia a, yar niul leil sir-nr-zzi, yel yar Yuenaxr dax Nixrnixrwei zzi ddei leil arsae lerler bei nia bbeix goxr mel nr bei piar a; niul si nr var piar a,” eine bbeix a.

<sup>10</sup> Yaa bei nr sir mel nr bei, huixrsoxr a, Arbosobo mia a. Yel Arbosobo dder Yuenaxr dax Nixrnixrwei zzi ddei leil de ze lol nia bbeix goxr mel sael a nr bei a.

Arbosobo Yihexrhuaxr Ca Leil Zoxlnixr A, Yuenaxr Sirzzi

**4** <sup>1</sup>Arbosobo Yuenaxr dax ddar bbeix goxr mel sael a nr bei a, Yuenaxr mel yarzi gge-nr-se, sirzzi zildu a. <sup>2</sup>Yel yar dder Yihexrhuaxr dax ddar biar a bbeix: “Yihexrhuaxr, ngo halae ngo mermi hher dae seir, ngo dder bbeix goxr a. Ca mel bei nr sir bei a lei, ni halae yaa leil perniar. Ni ca leil zoxlnixr; ni eine sirzzi nr so; ni ca leil yarzi perniar. Ni ca leil yarzi gexrddo faxr nia bbeix goxr a lei, ni faxr nr var mel ngo saexl, yel ngo Tasi mermi pa mal arddeir a. <sup>3</sup>Yihexrhuaxr, ngo ni leil qiuxr, ni ngo leil si lol la. Ngo si a mel bir gol dae leil lei seir.”

<sup>4</sup>Nael Yihexrhuaxr yar leil ddarkoxl a bbeix: “Ni eine sirzzi a hoxr a ngo?”

<sup>5</sup>Yuenaxr dder zzi eil ddei gga ddux a, zzi ddei dofa piar a gga cux dae a. Yar armael ddei xigex ar ddei daxr. Yel xigex avixsaer ggie cux dae a, Nixrnixrwei zzi ddei arsaesael loxr bbe i dae. <sup>6</sup>Yel Arbosobo Yihexrhuaxr sixzzei ar cu ner du lei lol. Avix ddei Yuenaxr oldde taex leil jiul gex dae lol a, yar leil lexl nr no lol. Eine ar cu ner du lei a, Yuenaxr mel ggese zildu a. <sup>7</sup>Nael giedae cirnehe, Arbosobo bberzzi ar te leil miardal a, sixzzei eil cu leil kexl ssi lol. Yel, sixzzei eil cu zzu zil a. <sup>8</sup>Merni ddux lei a mel, Arbosobo mersi jia lol halae Yuenaxr oldde taex leil merni lexl zildu lol, Yuenaxr lexl olmi a. Yel yar yoxl bbeix: “Ngo leil si lol la. Ngo si a mel bir gol dae leil lei seir,” eine bbeix a.

<sup>9</sup>Arbosobo Yuenaxr leil bbeix: “Sixzzei eil cu si a, ni sirzzi a hoxr hoxr?”

Yuenaxr ddarkoxl a bbeix: “Arsaenga a nr hoxr? Ngo sirzzi zil niazzir dae a.”

<sup>10</sup>Nael Yihexrhuaxr bbeix: “Sixzzei eil cu ni dae teixl lei nr nga, ni yar leil guaxr nr goxr, cir xixl dder ner vaer du lei a, giedae cir xixl yoxl si zil a. Ni halae korseil! <sup>11</sup>Halmel, Nixrnixrwei zzi ddei gga giel, vael leixr yo leixr lei bbe teixl lei nr xie ca mel lei 120,000 leil lei miur leixl, halae zzeir lei cirke zza. Ngo zzi yarzi vaer eil ddei leil kor-nr-seil mel arddollei?”